

nobilitata. Amphibalus autem B. Albani Doctor, & fidelis ad fidem informator hinc oriundus erat. Situs urbis egregius super Oske flumen nauigio mari influente idoneum, syluis & pratis urbs illustrata. Hic magni illius Arthuri famosam curiam Legati adire Romani. Vbi & Dubritius Archiepiscopus Dauidi Meneuensi cessit honorem, ab hinc Meneuiam Metropolitana sede translata. ]

De Dubritio illo scribunt eum à juvenilibus annis maximum apud Britannos obtinuisse nomen, nec minus scientijs quam moribus insignem fuisse, multosque non ex vicinis solum, sed etiam ex remotis regionibus, discipulos habuisse. His scholas erexit ad Vagæ fluminis ripam, quibus assidua lectione multis annis præfuit, ac inter alios Thelium, Sampsonem, & Aidanum obaudientes habebat. Cum autem Germanus & Lupus in Britanniam è Gallia euocati venissent, ab ipsis Episcopus Landauensis ordinatus est: tamque cum Rege Arthuro, quem Britannici regni diademate, ut dicitur, donari curauit, gratiam iniit, ut Carleonensis Archiepiscopus factus fuerit; tandemque à Carleona in suam Meneuiam Archiepiscopalem sedem transtulerit, ubi ad Normanorum usque tempora permanfit, adeo ut à Meneuensi Pontifice omnes Cambrorum siue Vvallorum Episcopi, tamquam à suo Metropolita, consecrationem acciperent. Habuit autem, si Houedeno credimus, Carleonensis Metropolita, hosce suffraganeos Episcopos, Landauensem, Bangorensem, Assauensem, Vvigorniensem, Herefordensem, Cestrensem & Paternensem. Sed Houedeno haud assentiuntur plerique Britannici scriptores, qui aliquibus ex his omissis, alios ei subijciunt. Quidquid sit, omnes Carleonam Metropolim Ecclesiasticam fuisse aiunt: unde nec huic id honoris concedere moramur, licet, ut verum fateamur, apud neminem ex authoribus, qui sex primis sæculis vixerunt, pro Metropoli Ecclesiastica, quod viderimus, habeatur. Obijt autem Dubritius ille anno salutis 522 prius in locum suum, ut diximus, ordinato Dauide magni Arthuri auunculo sanctitate & religione conspicuo, à quo & hæc sedes sancti Dauidis nomen consecuta est.

Hæc de Britannia Metropolitibus Ecclesiasticis. Quæ verò his subiectæ fuerint sedes Episcopales, penè vnus ex antiquis refert venerabilis Beda; & nos cum eo, ut plurimum, recensebimus. Quod si eas per Prouincias digestas non dederimus, ne mireris: quandoquidem plures nunc sub vna, nunc sub altera Metropoli pro temporum varietate ipsis Metropolitibus mutatis constituent Britannici scriptores. Quis autem cuiusque situs sit, in tabula Geographica videbitur.